

Kembara Mahkota Johor (KMJ) 2016

Melabuhkan Tirai Dengan Penuh Meriah

KEMBARA Mahkota Johor (KMJ) 2016 akhirnya melabuhkan tirainya pada 17 Mei lalu dengan melakukan hentian terakhir di Kawasan Rehat dan Rawat (RnR) Pandan Lebuhraya Penyuraian Timur (EDL).

Kembara tersebut yang merupakan edisi ke-19 memberi peluang kepada rakyat beramah mesra serta merapatkan lagi hubungan antara Kesultanan Johor dengan rakyat, disamping turut menghulurkan bantuan kepada golongan yang kurang berkemampuan.

Apa yang menarik untuk acara kali ini adalah sebanyak tiga buah koleksi trak Mack milik Sultan Johor, Sultan Ibrahim Sultan Iskandar membuat penampilan pertama kali dengan menyertai kembara yang melibatkan laluan sepanjang 842 kilometer merentasi sepuluh daerah di seluruh Johor bermula 14 Mei lalu.

Sultan Ibrahim telah berkenan untuk memandu sendiri trak Mack yang baru sahaja diterima pada Januari lalu sambil diiringi dua trak yang sama jenis diiringi 35 buah motosikal berkuasa tinggi, sepuluh kenderaan pacuan empat roda dan Kelab Trak Johor sepanjang empat hari kembara berlangsung.

KMJ 2016 mengambil tempat di Dataran Bandaraya Johor Bahru sebagai titik permulaan, yang dirasmikan oleh Sultan



Trak Mack tiba di perkarangan Dataran Bandaraya Johor Bahru.

Johor sendiri, di samping berpeluang menyaksikan masyarakat serta rakyat jelata ber-satu padu turun padang seawal jam 8 pagi untuk memberi semangat dan penghormatan sebelum pelancaran konvoi tersebut.

Baginda Tuanku ditemani Permaisuri Johor, Raja Zarith Sofiah Sul-

tan Idris Shah; Tunku Temenggong Johor, Tunku Idris Iskandar; Tunku Panglima Johor, Tunku Abdul Rahman dan Tunku Putera Johor, Tunku Abu Bakar.

Antara laluan yang menjadi perhentian sepanjang konvoi kembara Johor Bahru diikuti Kulai, Kota Tinggi, Mersing, Kluang, Segamat, Tangkak, Muar, Batu Pahat dan akhirnya Pontian.

Selain itu, konvoi KMJ turut mengambil peluang menyambut serta meraikan kejayaan Pasukan Bola Sepak Johor Darul Takzim (JDT) di Taman Yayasan, Segamat bersama-sama ribuan rakyat jelata setelah berjaya meraih kemenangan sebagai juara Piala FA menentang PKNS FC pada 15 Mei lalu.

Pada hari ketiga kembara, Sultan Ibrahim sempat berhenti di daerah Tangkak untuk menyambut Sambutan Hari Guru 2016 bersama-sama rakyat jelata dan pada masa sama menyampaikan sumbangan kepada golongan yang kurang berkemampuan.

Konvoi yang melibatkan lebih 1,600 peserta ini menjadikan RnR Pandan sebagai lokasi terakhir penutup KMJ 2016.



Sultan Johor, Sultan Ibrahim Sultan Iskandar bersama Tunku Mahkota Johor, Tunku Ismail Sultan Ibrahim semasa sambutan kemenangan Pasukan Johor Darul Ta'zim (JDT) menjuarai Piala FA di Taman Yayasan, Segamat.



Masyarakat setempat turun padang untuk memberi semangat kepada Kembara Mahkota Johor 2016.